

歐陽文忠集

冊二

世說新語

卷之三

居士集卷第五

集五

古詩一十八首

答原父一作答劉廷評

炎歊鬱然蒸午景熾方燄子來清風興蕭蕭吹几簟又如沃瓊漿遽
飲不知厭嗟予學苦晚白首困鉛槧危疑奚一作何所質孔孟久已
空羣儒窒自私惟子通且贍幸時丐贏餘屢得飽飢歉嚴嚴一作落
落春秋經大法誰敢覘一本有譬猶天之蒼乃欲學而染兩句三才
失綱紀一作紀綱五代極昏墊盜竊恣怙一作發篋英雄爭奮劍興
亡兩倉卒事迹多遺欠一作貶纔能紀成敗豈暇誅姦僭聞見患孤
寡一作陋是非誰證驗嘗欣同好惡遂乞指瑕玷反蒙華袞褒如譽
嫫母豔救非當在早已暴一作暴惡何由斂苟能哀癘痼其可惜針
砭風矸或許邀湖綠方灩灩

蟲鳴

葉落秋水冷衆鳥聲已停陰氣入牆壁百蟲皆夜鳴蟲鳴催歲寒唧唧機杼聲時節忽已換壯心空自驚平明起照鏡但畏白髮生

奉答子華學士一作答韓絳安撫江南見寄之作一本無下

四字

百姓病已久一言難遽陳良醫將治之必究病所因天下久無事人情貴因循優游以爲高一作政寬縱以爲仁今日廢其小皆謂不足論明日壞其大又云力難振旁窺各陰拱當職自逡巡歲月侵隳頽紀綱遂紛紜坦坦萬里疆蚩蚩九州民昔而安且富今也迫以貧疾小不加理浸淫將徧身湯劑乃常藥未能去深根鍼艾有奇功暫痛勿吟呻痛定支體胖乃知鍼艾神猛寬相濟理古語六經存蠹弊革僥倖濫官絕貪昏牧羊而去狼未爲不仁人俊乂沉下位惡去善乃伸賢愚各得職不治未之聞此說乃其要易知行每艱遲疑與果決利害反掌間捨此欲有爲吾知力徒煩家至與戶到飽飢而衣寒三

王所不能豈特今所一作獨今爲難我昔忝諫列日常趨紫宸聖君
堯舜心閔閔極憂勤子華當來時玉音耳嘗親上副明主意下寬斯
人屯江南彼一方巨細到可詢一作論諭以上恩德當冬反陽春吾
言乃其槩豈一作非止一方云

送張洞推官赴永興經略司

一本云送張推官掌機宜

自古天下事及時難必成爲謀於未然聰者或莫聽患至而後圖智
者有不能未遠前日悔可爲來者銘熙熙彼西人老死織與耕狂狴
一作氏一朝叛烽火四面驚用兵五六年首惡竟逃刑仰賴天子聖

乾坤量包并苗頑不率德舜羽舞于庭謂此雖異類有生亦含情籬
籬被觸突譬若猗與孺馴擾以芻豢可呼隨指令稱藩效臣職冠帶
復人形四海得休息瘡痍肉新生敢問前孰失恃安而弛兵酒肴爲
善將循默乃各卿慮患謂生事高談笑難行一方兵遽起愚智共營
營上煩天子仁盱食憂吾氓謀議及臺阜幽棲訪巖扃小利不足爲

涓流助滄溟大功難速就倉卒始改更徒自益紛擾何由集功名乃
知深遠畫施設在安平今也實其時鑑前豈非明嚴嚴經略府罇俎
集豪英千營飽而嬉萬馬牧在壩相公黃閣老與國爲長城張子美
而秀文章博羣經從軍古云樂知己士所榮感激報恩義當來請長
纓

寄聖俞一作因馬察院至云見聖俞於城東輒書長韻奉寄

凌晨有客至自西爲問詩老來何稽京師車馬曜朝日何用擾擾隨
輪蹄面顏憔悴暗塵土文字光彩垂虹霓空腸時如秋蚓叫苦調或
作寒蟬嘶語言雖巧身事拙捷徑取蹈行非迷我今俸祿飽餘臍念
子朝夕勤鹽齏舟行每欲載米送汴水六月乾無泥乃知此事尙難
必何況仕路如天一作丹梯朝廷樂善得賢衆臺閣俊彥聯簪犀朝
陽鳴鳳爲時出一枝豈惜容其棲古來磊落材與知窮達有命理莫
齊悠悠百年一瞬息俯仰天地身醺雞其間得失何足校況與鳬鷺

爭稗稊憶在洛陽年各一作各年少對花把酒傾玻瓈二十年間幾
人任在者憂患多乖睽我今三載病不飲眼眊不辨騮與驪壯心銷
盡憶閑處生計易足纔疏畦優游琴酒逐漁釣上下林壑相攀躋及
身彊一作壯健始爲樂莫待衰病須扶攜行當買田清潁上與子相
伴把鋤犁

有馬示徐無黨

吾有千里馬毛骨何蕭森疾馳如奔風白日無留陰徐驅當大道步
驟中五音馬雖有四足遲速在吾心六轡應吾手調和如瑟琴東西
與南北高下山與林惟意所欲適九州可周尋至哉人與馬兩樂不
相侵伯樂識其外徒知價千金王良得其性此術固已深良馬須善
馭吾言可爲箴

天辰

天形如車輪晝夜常不息三辰隨出沒曾不差分刻一本有其行一

何勤乾健貴於易兩句北辰居其所帝座嚴尊極衆星拱而環大小
一作小大各有職不動以臨之任德不任力天辰主下土萬物由生
殖一動與一靜同功而異域惟王知法此所以治萬國

再和聖俞見答

兩畿相望東與西書來三日猶爲稽短篇投子譬瓦礫敢辱報之金
裹蹄文章至寶被埋沒氣象往往干雲霓飛黃伯樂不世一作並出
四顧驤首空長嘶嗟哉我豈敢一作能知子論詩一作經賴子初指
迷子言古淡有真味大羹豈須調以齏憐我區區欲彊學跛鼈曾不
離汙泥問子初何得臻此豈能直到無階梯如其所得自勤苦何憚
入海求靈犀周旋二紀陪唱和凡翼每並鸞皇棲有時爭勝不量力
何異弱魯攻彊齊念子京師苦憔悴經年陋巷聽朝音潮一作晨雞
兒啼妻噤一作噤午未飯得米寧擇粃與稊石上紫豪一作毫家故
有剡藤瑩滑如玻璃追惟平昔念少壯零落生死嗟分睽一揮累紙

恣奔放駿一作有若駕駱仍驂驪腹雖枵虛氣豪橫猶勝諂笑病夏
畦名聲不朽豈易得仕宦得路終當躋年來無物不可愛花發有酒
誰同攜問我居留亦何事方春苦旱憂民犁

感春雜言一本題下有和呂公著

鳩鳴兮屋上雀噪兮簷間百鳥感春陽有如動機關雄雌相呼和日
夕聒聒不得閑砌下兩株樹枯條有誰攀春風一夜來花葉何班班
乃知天巧奪人力能使枯木生紅顏奈何人爲萬物靈不及草木與
飛翾自從春來何所覺但恹睡美不覺白日高南山行逢百花不着
眼豈念四氣如回環却思年少憶一作念前事雖有駟駿難追還奈
何來日尚可樂曾不勉彊相牽扳淥酒如春波黃金爲誰慳人生一
世中一步一作笑百險艱俟河之清不可得聊自歌此譏愚頑

廬山高贈同年劉中允歸南康

廬山高哉幾千仞兮根盤幾百里截然屹立于長江長江西來走其

下是爲揚瀾左里一作蠡兮洪濤巨浪日夕相舂撞雲消風止水鏡
淨泊舟登岸而遠望兮上摩青蒼一作雲霄以瞻靄下壓后土之鴻
厖試往造乎其間兮攀緣石磴窺空豁千巖萬壑響松檜懸崖巨石
飛流淙水聲聒聒亂人耳六月飛雪灑石砭仙翁釋子亦往往而逢
兮吾嘗惡其學幻而言咙但見丹霞翠壁遠近映樓閣晨鍾暮鼓杳
靄羅幡幢幽花野草不知其名兮風吹露濕香澗谷時有白鶴飛來
雙幽尋遠去不可極便欲絕世遺紛瘡羨君買田築室老其下插秧
盈疇兮釀酒盈缸欲令浮嵐暖翠千萬狀坐臥常對乎軒窻君懷磊
砢有至寶世俗不辨珉與玳策名爲吏二十載青衫白首困一邦寵
榮聲利不可以苟屈兮自非青雲白石有深趣其氣兀硜何由降丈
夫壯節似君少嗟我欲說安得巨筆如長杠

送徐生一作徐無黨之澠池

河南地望雄西京相公好賢天下稱吹噓死灰生氣燄談笑暖律回

嚴凝曾陪罇俎被顧盼羅列臺閣皆名卿一作才能徐生南國後來
秀得官古縣依嶠陵脚靴手板實卑賤賢儁未可吏事繩攜文百篇
赴知己西望未到氣已增我昔初官便伊洛當時意氣尤驕矜主人
樂士喜文學幕府最盛多交朋園林相映花百種都邑四顧山千層
朝行綠槐聽流水夜飲翠幙張紅燈爾來飄流二十載鬢髮蕭索垂
霜冰同時並遊在者幾舊事欲說無人應一作磨文章無用等畫虎
名譽過耳如飛蠅榮華萬事不入眼憂患百慮來填膺羨子年少一
作少年正得路有如扶桑初日昇名高場屋已得儔世有龍門今復
登出門相送親與友何異籬鷦瞻雲鵬嗟吾筆硯久已格感激短章
一作章句因子興

葛氏鼎一本有歌字

大河昔決東南流蕭條東郡今遺湫我從故老問其由云古五鼎藏
高邱地靈川秀草木稠鬱鬱佳氣蒸常浮惟物伏見數有周祕藏奇

恠神所搜天昏地慘鬼哭幽至寶欲出風雲愁蕩搖山川失維陬九
龍大戰驅蛟虬剗然岸裂轟雲羈滑人夜驚鳥嘲啁婦走抱兒扶白
頭蒼生仰叫黃屋憂聚徒百萬如蚍蜉千金一掃隨浮漚天旋海沸
動九州此鼎始出人間留滑人得之不敢收奇模古質非今侔器大
難用識者不以示世俗遭擲擻明堂會朝饗諸侯饗官百品供王羞
調以五味烹全牛時有用捨吾無求二三子學雕琳球見之始驚中
歎愀披荒斲古爭窮蒐苦語難出聲伊嚶馬圖出河龜一作龍負疇
自古恠說何悠悠嗟吾老矣不能休勉彊作詩慙効尤

太白戲聖俞一作讀李白集効其體

開元無事一作太平二十年五兵不用太白閑太白之精下人間李
白高歌蜀道難蜀道之難難於上青天李白落筆生雲烟千奇萬險
不可攀却視蜀道猶平川宮娃扶來白已醉醉裏詩成醒不記忽然
一作來乘興登名山龍咆虎嘯松風寒山頭婆娑弄明月九域塵土

一作下看塵世
悲人寰吹笙飲酒紫陽家
紫陽真人駕雲車空山流水空流
花飄然已去凌青霞
下看一作堪笑區區郊與島
螢飛露濕吟秋草

邊戶

家世爲邊戶年年常備胡
兒僮習鞍馬婦女能彎弧
胡塵朝夕起虜騎蔑如無
邂逅輒相射殺傷兩常俱
自從澶州盟南北結歡娛
雖云免戰鬪兩地供賦租
將吏戒生事廟堂爲遠圖
身居界河上不敢界河漁

梅聖俞寄銀杏一作和聖俞銀杏見寄代書之什

鵝毛贈千里所重以其人
鴨脚雖百箇得之誠可珍
問予得之誰詩老遠且貧
霜野摘林實京師寄時新
封包雖甚微採掇皆躬親
物賤以人貴人賢棄而淪
開緘重嗟惜詩以報慇懃

與子華原父小飲坐中寄同州江十學士休復

歲晚忽不樂相過偶乘閑百年纔幾時一笑得亦艱有酒醉嘉客無
錢買嬌鬟問予官何爲侍從聯朝班朝廷多賢材何用蒯與管白髮
垂兩鬢黃金腰九環奈何章綬榮飾此木石頑於國略無補有慙常
在顏幸蒙二三友相與文字間江子獨捨我一作是高鴻去難攀秋
風動沙苑郡閣當南山吟詠日多暇詔條寬可頒寒雲雪一作暮紛
糝幽鳥春絲蠻勝事日向好思君何時還

迷懷

歲律忽其周陰風慘遼夏孤懷念時節朽質驚衰病憶始來京師街
槐綠方映清霜一以零衆木少堅勁物理固如此人生寧久盛當時
不樹立後世猶譏評顧我實孤生飢寒談孔孟壯年猶勇爲刺口論
時政中間蒙選擢官實居諫諍豈知身愈危惟恐職不稱十年困風
波九死出檻穽再生君父恩知報犬馬性歸來見親識握手相弔慶
丹心皎雖存白髮生一作日已迸慙無羽毛彩來與鸞皇並鍛翮追

羣翔孤唳驚衆聽嚴嚴玉堂署清禁肅而靜職業愧論思文章慙誥
命厚顏難久居歸計無荒逕閑就朋友笑語雜嘲詠歡情雖索寞
得酒猶豪橫羣居固可樂寵祿尤難幸何日早收身江湖一漁艇

和劉原父澄心紙一作奉賦澄心堂紙

君不見曼卿子美真奇才久已零落埋黃埃子美生窮死愈貴殘章
斷藁如瓊瑰曼卿醉題紅粉壁壁粉已剝昏烟煤河傾崑崙勢曲折
雪壓太華高崔嵬自從二子相繼沒山川氣象皆低摧君家雖有澄
心紙有敢下筆知誰哉宣州詩翁餓一作飢欲死黃鵠折翼鳴聲哀
有時得飽好言語似聽高唱傾金罍二子雖死此翁在老手尙能工
翦裁奈何不寄反示我如棄正論求俳詼嗟我今衰不復昔空能把
卷闔且開百年干戈流戰血一國歌舞今荒臺當時百物盡精好往
往遺弃淪蒿萊君從何處得此紙純堅瑩膩卷百枚官曹職事喜一
作樂閑暇臺閣唱和相追陪文章自古世不乏間出安知無後來

居士集卷第六 集六

古詩二十五首

奉使契丹道中答劉原父桑乾河見寄之作

憶昨初受命同下紫宸朝問君當何之笑指北斗杓共念到幾時春
風約回鑣所持既異事前後忽相遼歲月坐易一作若失山川行知
遙回頭三千里雙闕在紫霄我老倦鞍馬安能事吟嘲君才綽有餘
新句益一作亦飄飄前日逢呂郭解鞍憩山腰僮僕相問喜馬鳴亦
蕭蕭出君桑乾詩寄我慰寂寥又喜前見君相期駐征輶雖知不久
留一笑樂亦聊歸路踐冰雪還家脫狐貂君行我卽至春酒待相邀

書素屏

我行三千里何物與我親念此尺素屏曾不離我身曠野多黃沙當
午白日昏風力若牛弩飛砂還射人暮投山椒館休此車馬勤開屏
置牀頭輾轉夜向晨臥聽穹廬外北風驅雪雲勿愁明日雪且擁狐